

BARAZA LA WAWAKILISHI ZANZIBAR

Simu Nam. + 255 24 2230602/1
Fax Nam. + 255 24 2230215
Tovuti: www.zanzibarassembly.go.tz



SANDUKU LA BARUA 902,
ZANZIBAR
Barua Pepe: zahore@zanlink.com

MAONI YA KAMATI YA KUDUMU YA KUSIMAMIA OFISI ZA VIONGOZI WAKUU WA KITAIFA YA BARAZA LA WAWAKILISHI JUU YA UTEKELEZAJI WA BAJETI YA OFISI YA RAIS IKULU NA UTAWALA BORA KWA MWAKA WA FEDHA 2015/2016 NA MAKADIRIO YA MAPATO NA MATUMIZI YA OFISI KWA MWAKA 2015/2016

UTANGULIZI:

Mhe. Spika, kwanza kabisa napenda kuchukua fursa hii kumshukuru Mwenyezi Mungu kwa kutujaalia kukutana kwa mara nyengine tena katika kikao hichi cha bajeti cha mwaka 2015/2016 tukiwa hai na wazima wa afya ambayo ni neema kubwa kwetu aliyotujaalia Allah (s.w) kwa lengo la kujadili bajeti mwaka 2015/2016 kwa nchi yetu.

Mhe. Spika, pia napenda kukushukuru wewe binafsi kuweza kunipatia nafasi hii mbele ya Baraza lako tukufu kuweza kuwasilisha maoni ya Kamati ya Kusimamia Ofisi za Viongozi Wakuu wa Kitaifa juu ya utekelezaji wa Bajeti kwa Ofisi ya Rais, Iikulu na Utawala Bora kwa mwaka wa fedha 2015/2016.

Mhe. Spika, naungana na wenzangu kwa kumpa pole Mhe Rais wetu wa Zanzibar kwa kufiliwa na dada yake mpenzi, hayo ni majaaliwa yake Subhanahu Wataalah, kwa hiyo tunawaomba familia wawe na subira na tunamuomba Mwenyezi Mungu amlaze mahali pema peponi, Amin.

Mhe. Spika, kabla ya kuwasilisha maoni ya Kamati vile vile napenda kutoa mkono wa pole kwa wale wote walioathirika na maafa ya mvua zinazoendelea kunyesha, ambapo tunawataka wawe na subra katika kipindi hichi kigumu, kwani ni mipango ya Mwenyezi Mungu aliyotuletea sisi waja wake.

Mhe. Spika, kwanza kwa niaba ya Kamati naomba kumpongeza sana Mhe Rais wa Zanzibar na Mwenyekiti wa Baraza la mapinduzi, kwa kuweza kutuongoza katika kipindi chake hiki cha mwanzo cha miaka mitano, kipindi ambacho kimeshuhudia mabadiliko makubwa ya kisiasa na kiuchumi, kwani amekabidhiwa kuiongoza Serikali ya Zanzibar yenye mfumo mpya kabisa Duniani yenye mfumo wa Umoja wa Kitaifa ambayo bila ya kuyumba ameiongoza kwa umahiri na utulivu mkubwa ambapo hadi hivi sasa anamalizia kipindi hiki cha mwanzo bado Nchi yetu iko katika Amani na utulivu mkubwa, huku wananchi wote wa Zanzibar wakiendelea na shughuli zao bila ya bughudha ya aina yoyote.

Mhe. Spika, pongezi zetu nyingine kwa Rais wetu ni kwa kuanzisha Utaratibu wa Serikali yetu wa kujitathmini katika utekelezaji wa mipango yake kwa kila kipindi cha miezi mitatu maarufu kama (Bango Kitita). Pamoja na matatizo madogo madogo, lakini mpango huu umeanza kuleta matunda, kwani leo hii uchumi wetu umeimarika kwa kiasi kikubwa hapa nchini, kwa hiyo hatuna budi kumpongeza sana Mhe. Rais wetu kwa mipango imara, isipokuwa tunamuomba awe mkali pale wanapotokea wachache kurejesha nyuma yale anayoyapanga.

Mhe. Spika, Rais wetu wakati wa Kampeni zake za Uchaguzi, na mara tu baada ya kuapishwa na kukabidhiwa kuiongoza Nchi yetu, alitoa ahadi kuwa yeye akichaguliwa kuiongoza Zanzibar basi moja ni kuhakikisha ataiongoza Nchi kwa kufuata Katiba na Sheria.

Na kweli, kwani hayo yote tumeyashuhudia, kwani tayari ndani ya kipindi chake ameweza kuunda Taasisi ya Kuzuia na kupambana na Rushwa na Uhujumu wa Uchumi hapa Zanzibar, pia ameweza kuunda Tume ya kuchunguza na kusimamia maadili ya Viongozi wa Umma. Na taasisi hizi zote zimeanza kufanya kazi. Hiyo yote ni misingi mikuu ya Utawala Bora kwani taasisi hizi kisheria ziko huru kufanya kazi zake bila ya kuingiliwa na mtu.

Mhe. Spika, Kamati pia inapenda kumshukuru Mhe Waziri wa Nchi Ofisi ya Rais, Ikulu na Utawala Bora pamoja na watendaji wa Ofisi hii kwa utendaji mzuri wa kazi zao, ambao unaipelekea Kamati kuweza kutekeleza majukumu ya kazi zake za kila siku kwa ufanisi mzuri katika kipindi chote cha miaka mitano.

Hata hivyo, napenda kuishukuru Ofisi hii kwa kuweza kuwasilisha mbele ya Baraza lako Tukufu bajeti ya Wizara yao kwa mwaka 2015/2016 kwa umahiri mkubwa, katika mfumo mpya wa PBB.

Mhe. Spika, Kamati yangu inaungana na Waziri alivyompongeza Mhe. Rais wa Jamhuri ya Muungano wa Tanzania Dkt. Jakaya Mrisho Kikwete kwa kuweza kuiongoza Jamhuri ya Muungano wa Tanzania na kuweza kumaliza ngwe yake ya miaka kumi, ambapo ndani ya ahadi zake za mwanzo ilikuwa ni kumaliza mgogoro wa kisiasa Zanzibar.

Kwa kweli kauli yake hiyo aliyoitoa Bungeni katika ufunguzi wa Bunge la mwanzo la Jamhuri ya Muungano wa Tanzania hakuna atakayebisha, leo hii Zanzibar hakuna tena mgogoro wa kisiasa, lakini pia Dkt. Jakaya Kikwete baada ya kusikia kilio cha muda mrefu hasa cha wananchi wa Zanzibar kwenye kero za Muungano, tunamshukuru Rais wetu wa Muungano kwa kushirikiana na Rais wa Zanzibar, kwa kuwaruhusu wananchi wetu kupendekeza nini kifanyike ili kuondoa kero za Muungano, na hivi sasa na *Alhamdulillah* tayari Katiba inayopendekezwa imeshakuwepo, tunaamini wananchi wote wa Tanzania tutaipigia kura ili kuweza kuijenga Jamhuri ya Muungano yenye matumaini mapya.

Tunaamini Katiba hiyo itatoa fursa kubwa za kiuchumi hapa Zanzibar ambapo hapo mwanzo hazikuwepo. Kwa niaba ya Kamati yangu tunakuomba Mhe. Waziri uweze kutupelekea salamu zetu hizo kwa Mhe. Rais wa Jamhuri ya Muungano kwa maandishi, na pia umwambie kuwa tunamuomba maisha mema ya kustaafu kwake na kumtakia umri mrefu wenye afya njema.

Mhe. Spika, kamati yangu inaipongeza Serikali kupitia Idara ya Ushirikiano wa Kimataifa na Wazanzibari wanaoishi Nje ya Nchi kwa kazi nzuri wanazozifanya, kwa kuiwakilisha Zanzibar katika vikao mbali mbali vya kikanda na Jumua, lakini pia kuanza Utaratibu wa kuwatafuta na kuwaorodhesha Wazanzibari wanoishi nchi za nje ili kuwatambua na kutafuta njia za kushirikiana nao katika maendeleo ya kiuchumi hapa Zanzibar. Pamoja na pongezi hizo kamati yangu imepitisha fungu la Idara hii kwa shingo upande, kwani pesa walizotengewa ni chache, kwani kuna uwezekano mkubwa wakashindwa kushiriki vikao vingi, hasa vile vya Sekretarieti kwani wao wanakuwa ndio wapishi au waandaaji wakubwa wa agenda na mipango ambayo baada ndio Mawaziri husika huja kujadili na kutia saina, lakini pia pesa hizo hazitoweza kuwawezesha kutembea sehemu mbalimbali duniani ili kupata nafasi ya kuwaona na kuzungumza na Wazanzibari hao na kujadili na kuangalia fursa kwa upande wa Zanzibar.

Mhe Spika, kwakua Serikali yetu hivi sasa kwa makusudi tumeamua kuwashirikisha Diaspora katika maendeleo ya Nchi yetu basi kamati yangu inaishauri Serikali, kuweza kutoa special Offer kwa Wazanzibari wote waishio Nchi za nje kuingia Nchini bila ya kulipa Viza kwani tumeona baadhi ya Nchi Duniani wameweza kuwaruhusu Diaspora wao kuingia katika Nchi zao bila ya kulipia Viza ili kuweza na wao kujiskia kua damu yao kwa Nchi yao inathaminiwa, vile vile kuweza kupewa kadi maalum kama ni Permit maalum ya kuweza kukaa Nchini kwa muda mrefu zaidi kulinganisha na wageni wengine, jambo hili litaweza kuwavutia na kuwafanya kuongeza mapenzi kwa Nchi yao.

Mhe. Spika, kwa kuwa tunamalizia kipindi hiki cha miaka mitano ya mwanzo wa Serikali hii ya Awamu ya Saba haitokuwa vyema kutokuwapa pongezi zetu za dhati kwa Afisi ya Mdhibiti na Mkaguzi wa Hesabu Zanzibar wakiongozwa na Mwanamama shupavu, muadilifu, asiyeumba wala kubabaika, kwa kuweza kuiongoza taasisi hiyo na kuweza kuisaidia sana Kamati yetu ya *PAC*, kwani bila ya afisi hii ya *CAG*, basi kamati hiyo isingeweza kujua na kufichua manyago na ubadhirifu wa pesa za Umma, lakini kazi yao kubwa imelisaidia sana Baraza lako hili kuweza kuisimamia vizuri Serikali, kwa hiyo tunatoa pongezi na wito, *Inshaallah* Mwenyezi Mungu awajaalie nguvu na moyo wa kufanyakazi, na tukijaaliwa mwakani basi tuendeleo kutumia maarifa yao katika kulinda mali za Umma.

Pia tunawapongeza kwa kuimarisha majengo yao kwa Unguja na Pemba, pongezi pia kwa kuweza kuwapa fursa vijana wake kwa kujiendeleza na kuweza kuzalisha wataalamu wake mwenyewe bila ya kutegemea kuajiri wataalamu kutoka nje ya Ofisi hii, na wengine inafaa waende wakaige kwa *CAG*.

Mhe. Spika, pia kamati yangu inatoa pongezi kwa Tume ya Mipango ambayo Mhe. Rais yeye mwenyewe ndiye Mwenyekiti, ambapo wasimamizi wakuu katika utendaji pia inaongozwa na Mwanamama shupavu, mtaalamu aliyebobea katika masuala ya mipango pamoja na Kamishna, ambao kwa kweli tumeona matunda yao, kwani hata huu Utaratibu wa *PBB* ni matunda ya Tume hii.

Kwa kweli Tume hii ndio moyo wa mipango yote ya Serikali ya Mapinduzi ya Zanzibar. Kamati yangu inaipongeza Serikali kupitia Tume ya Mipango kwa kuletwa sheria ya *PPP*, tunaomba Serikali kama tulivyoshauri kwenye Kamati kuwa Serikali yetu itafute wawekezaji wenye uwezo katika miradi ya *PPP*, ili kuhakikisha Nchi yetu inapiga hatua kubwa za maendeleo na kiuchumi hapa Zanzibar, kwani tunaamini miradi hiyo ndiyo itakayotoa ajira nyingi na tija kwa Nchi yetu hapo baadae.

Mhe. Spika, ili kuwapa nafasi na wajumbe wengine kuweza kuogelea katika mafanikio ya Afisi hii ya Rais basi naomba nimalizie hapa kwa leo hii.

Mhe. Spika, kamati yangu kwa mara nyingine inawapongeza Mhe. Makamu wa Kwanza wa Rais na Mwakamu wa Pili wa Rais, kwa kuweza kumshauri vizuri Rais wetu katika kuiweka nchi yetu katika amani na utulivu lakini pia kuiongoza kwa busara na kuimarika kwa uchumi wa Nchi yetu.

Mhe. Spika, aidha nitakuwa mwizi wa fadhila nisipowashukuru Wajumbe wa Kamati yangu kwa kazi kubwa waliyoifanya kwa muda wote wa kipindi cha miaka mitano. Ushirikiano wao pamoja na moyo wa dhati katika kutekeleza majukumu yao katika kufanikisha kazi za Kamati ikiwemo hii ya kuchambua na kuijadili bajeti ya Ofisi ya Rais, Ikulu na Utawala Bora, sasa kwa ruhsa yako Mhe. Spika, naomba niwatambue Wajumbe wa Kamati yangu kama ifuatavyo:-

1. Mhe Hamza Hassan Juma Mwenyekiti
2. Mhe. Saleh Nassor Juma Makamo Mwenyekiti

- | | |
|----------------------------------|--------|
| 3. Mhe. Ali Mzee Ali | Mjumbe |
| 4. Mhe. Ashura Sharif Ali | Mjumbe |
| 5. Mhe. Shadya Mohammed Suleiman | Mjumbe |
| 6. Mhe. Makame Mshimba Mbarouk | Mjumbe |
| 7. Mhe. Subeit Khamis Faki | Mjumbe |
| 8. Ndg. Rahma Kombo Mgeni | Katibu |
| 9. Ndg. Othman Ali Haji | Katibu |

Mhe. Spika, baada ya utangulizi huo naomba kutoa maoni ya Kamati kwa Ofisi ya Rais, Ikulu na Utawala Bora kwa bajeti hii ya mwaka 2015/2016 kama ifuatavyo:-

Mhe. Spika, kamati yangu inapenda kuipongeza Ofisi ya Rais kwa kutekeleza kwa kiasi mpango wa bajeti kwa mwaka 2014/2015 ambapo imeweza kufanya mambo mengi mazuri ambayo yameweka misingi ya uchumi imara na endelevu, pamoja na mambo mengine mbali mbali ikiwemo kuandaa Rasimu ya Sera ya Diaspora, kuanzisha Sheria ya *PPP* ambayo ndio ufunguo wa maendeleo kwa nchi yetu, kukamilisha ujenzi wa ofisi ya Mdhambi na Mkaguzi Mkuu wa Hesabu za Serikali, kuanza kutumika kwa Ikulu ya Kibweni na Ikulu ya Mkoani, kufanya matengenezo ya Ofisi ya Afisa Mdamini Pemba, ambayo ilikuwa ni kilio cha muda mrefu kwa upande wa Pemba na mambo mengine mengi ambayo Kamati imeona ni hatua nzuri iliyofikiwa na Ofisi hii kwa vile kulikuwa na mambo ya muda mrefu hayajafanyiwa kazi lakini kwa sasa yameweza kutekelezwa kwa kiasi kikubwa ambapo kamati inatoa pongezi kwa utekelezaji huo.

Mhe. Spika, lakini Kamati bado pia inaendelea kuhimiza wizara iendeele kuyatekeleza na yaliyobakia; ikiwemo ujenzi wa *Rest House* ya Micheweni, na *Rest House* ya Fumba ikiwemo kujenga ukuta wa kuzuia mmong'onyoko kwa upande wa Baharini, kwa lengo la kuleta ufanisi wa majukumu yao japokuwa utekelezaji huo kwa kiasi kikubwa hukwamishwa kutokana na uingizwaji mbaya wa fedha, na kupelekea kutofikiwa malengo yaliyokusudiwa na wizara. Kamati yangu inaamini kwa utaratibu huu mpya wa *PBB* tunategemea mwakani mambo yatakwenda vizuri.

Mhe. Spika, kamati pia imeridhishwa na utekelezaji wa miradi kwa mwaka 2014/2015 ambapo Ofisi ya Rais imeweza kutekeleza ikiwemo mradi wa uimarishaji wa nyumba za viongozi na nyumba za Serikali, Mradi wa kuimarisha juhudi za kuzuia rushwa na uhujumu uchumi, programu ya kujenga uwezo wa utekelezaji kwa taasisi za Serikali, mradi wa kurasimisha rasilimali na biashara za wanyonge (MKURABITA), mradi wa kuifanyia mabadiliko na kuimarisha tume ya mipango, mradi wa uimarishaji takwimu Zanzibar, mradi wa utafiti wa hali ya utumishi nchini, mradi wa kuoainisha masuala ya idadi ya watu, afya na uzazi, jinsia na umaskini katika mipango ya maendeleo, mpango wa ufuatiliaji na tathmini yenye kuleta matokeo ya MKUZA II, na mradi wa mashirikiano baina ya sekta ya umma na sekta binafsi. (*PPP*).

Mhe. Spika, baada ya kuelezea mafanikio katika utekelezaji wa wizara kwa kipindi cha miaka mitano, kwa hiyo tulipata kuipitia bajeti ya ofisi ya Rais katika mfumo mpya wa *PBB* ambao kama tulivyoona ulikuwa na changamoto kwa kiasi fulani, kutokana na kuwa ni mfumo mpya tofauti na ule tuliozoea,

lakini hata hivyo Kamati iliipitia na kutoa mawazo yao na hatimaye kuipitisha na leo hii tunatoa maoni ya Kamati kama ifuatavyo:-

Mhe. Spika, bajeti ya Ofisi ya Rais, Ikulu na Utawala Bora kwa mwaka wa fedha 2015/2016 itakuwa na jumla ya programu kuu kumi na tano (15) na programu ndogo ishirini na moja (21) kupitia katika Ofisi zifuatazo:-

- i. Ofisi ya Rais Ikulu na Utawala Bora
- ii. Ofisi ya Baraza la Mapinduzi
- iii. Tume ya Mipango
- iv. Ofisi ya Mdhibiti na Mkaguzi Mkuu wa Hesabu za Serikali; na
- v. Mamlaka ya Kuzuia Rushwa na Uhujumu Uchumi.

Mhe. Spika, kwa upande wa Idara ya faragha katika afisi ya Rais Kamati yangu inawapongeza, kwa kweli wamefanya kazi kubwa sana ya kuboresha Ikulu zetu lakini pia kushughulikia huduma za Mhe. Rais, ikiwemo kusimamia ahadi za Mhe. Rais.

Kwa kweli tunampongeza sana Rais kwa kutekeleza ahadi zake ndani ya kipindi cha miaka mitano, kwani moja katika ahadi ambayo aliahidi ni kuongeza bei ya zao la karafuu, na kweli ameweza kufanya hivyo jambo ambalo kwa miaka mingi lilishindwa kutekelezeka.

Mhe. Spika, vile vile ameweza kutekeleza ahadi yake ya kununua Meli mpya ya Abiria na mizigo ili kuondoa kero ya usafiri baina ya Zanzibar, Pemba na Tanzania Bara.

Halikadhalika Mhe. Rais ndani ya miaka mitano ameweza kurejesha nidhamu ya fedha Serikalini, kwani ameweza kusimamia na kuziba kwa kiasi kikubwa ile mianya ya uvujaji wa fedha za umma, na hivi sasa tunaweza kujivunia kuwa ndani ya miaka mitano hii makusanyo ya fedha kila mwaka yamekuwa yakiongezeka siku hadi siku, hii inatuonesha kuwa Rais wetu anao uwezo mkubwa wa kuiongoza Zanzibar na hata Tanzania nzima.

Mhe. Spika, pia Rais wetu ameweza kuyashughulikia matatizo makubwa yaliyokuwepo kwenye ujenzi wa Uwanja wa Ndege wa Zanzibar, na jitihada zake hizo pamoja na busara kubwa hivi sasa uwanja huo umeanza tena kujengwa, na tunategemea ni yeye mwenyewe ndiye atakayekuja kuuzindua uwanja wetu huo.

Mhe. Spika, kama alivyoeleza Waziri kwa upande wa Ofisi ya Rais Ikulu na Utawala Bora fungu A01 ina jumla ya programu kuu tatu na programu ndogo saba, ambapo kwa mwaka wa fedha 2015/2016 imetengewa jumla ya Tanzania shilingi Bilioni Nne, mia tisa arobaini na tatu milioni na laki moja (**4,943,100,000**) na kwa upande wa fedha za maendeleo zimetengwa jumla ya Tanzania Shilingi Bilioni Moja na milioni Mia Mbili (**1,200,000,000**) kwa mwaka 2015/2016.

Mhe. Spika, Ofisi ya Rais na Mwenyekiti wa Baraza la Mapinduzi fungu A02 nayo ina jumla ya programu kuu mbili na programu ndogo nne. Kwa mwaka wa fedha wa 2015/2016 ambapo jumla ya Tanzania Shilingi Bilioni Moja, Mia tano na thamanini na nane milioni na laki moja (**1,588,100,000**) zimekadiriwa kutumika kwa kazi za kawaida.

Mhe. Spika, Kwa upande wa Ofisi ya Ushirikiano wa Kimataifa na Uratibu wa Wazanzibari Wanaoishi Nje ya Nchi, fungu A03 ina jumla ya programu kuu tatu na programu ndogo tatu kwa mwaka wa fedha 2015/2016 ambapo jumla ya Tanzania shilingi Milioni mia Sita na Sitini na tatu na laki nne. **(663,400,000)** zinakadiriwa kutumika katika kazi za kawaida.

Mhe. Spika, Tume ya Mipango yenye fungu A04 kwa upande wake ina jumla ya programu kuu tatu na programu ndogo tano. Kwa mwaka wa fedha 2015/2016 ambapo zimekadiriwa kutumika jumla ya Tanzania Shilingi Bilioni Kumi na Sita, Mia tatu na ishirini na nane milioni na laki tisa **(16,328,900,000)** ambazo Bilioni Tatu, Milioni mia sita na kumi na laki Saba (**3,610,700,000**). Makadirio ya kazi za kawaida na Bilioni Kumi na mbili, Mia saba na kumi na nane milioni na laki mbili **(12,718,200,000)** kwa makadirio ya kazi za maendeleo.

Mhe. Spika, Kwa upande wa Ofisi ya Mdhibiti na Mkaguzi Mkuu wa Hesabu za Serikali yenye fungu A05 ina jumla ya programu kuu mbili na programu ndogo mbili. Kwa mwaka wa fedha 2015/2016 ambapo zimekadiriwa kutumika jumla ya Tanzania Shilingi Bilioni Mbili, Milioni mia tatu na arobaini na moja na laki tano **(2,341,500,000)** kama makadirio ya kazi za kawaida.

Mhe. Spika, Na kwa upande wa Mamlaka ya Kuzuia Rushwa na Uhujumu Uchumi yenye fungu A06 nayo kwa upande wake ina jumla ya programu kuu mbili na programu ndogo tatu, ambapo kwa mwaka wa fedha 2015/2016 imekadiriwa kutumika jumla ya Tanzania Shilingi Milioni Mia nane na thalathini na saba na laki mbili **(837,200,000)** kwa kazi za kawaida.

Mhe. Spika, kamati yangu imeridhishwa na fedha zilizotengwa katika kitengo cha Teknolojia ya Habari na Mawasiliano ambapo jumla ya Tanzania Shilingi Milioni Sabini na tatu, laki nne na hamsini na mbili elfu **(73,452,000)** zimekadiriwa kwa mwaka 2015/2016 ambapo zitasaidia kwa kiasi kuweza kukiendesha kitengo na kufanya kazi ipasavyo, kwani bado kitengo kinahitaji kuboreshwa ili kwenda sambamba na kupiga hatua katika masuala ya teknolojia na mawasiliano kama ilivyo katika nchi zilizoendelea huko ulimwenguni.

Mhe. Spika, Bado kamati yangu inaendelea kuisisitiza Ofisi ya Rais, Ikulu na Utawala Bora kuendeleza juhudi katika kusimamia utekelezaji wa majukumu yake, kwani hii ni Ofisi nyeti inayosimamia makaazi ya viongozi wetu ambayo yanahitaji uangalizi wa hali ya juu kiusalama na kihadhi kama makaazi ya viongozi.

Kwa mnasaba huo kamati inasisitiza kumalizwa suala la ujenzi wa Ikulu ya Micheweni ambayo imekuwa ni kilio cha muda mrefu sasa.

Mhe. Spika, Kwa upande wa Mamlaka ya Rushwa na Uhujumu Uchumi kamati yangu inaendelea kusisitiza kuangaliwa zaidi katika kupatiwa vifaa na nyenzo wanazostahiki katika utendaji wa kazi zao, ili iweze kutekeleza malengo ya uwepo wake na sio kupelekea kutoa mianya ya kuwalinda wala rushwa, kutokana na mapungufu ya utekelezaji wa kazi zao, kwani itakuwa lengo lililokusudiwa na Serikali halikufikiwa.

Mhe. Spika, ili taasisi hii iweze kufanya kazi zake vizuri, basi ni lazima kuboresha maslahi yao, kwani mazingira ya kazi zao sawa na Afisi ya CAG huwa wanapungukiwa na marafiki wengi, kwani huhisi kama ni tishio kwa maisha yao kutokana na kazi zao.

Mhe Spika, pamoja na kazi kubwa na nzuri inayofanywa na Mamlaka ya kuzuia na kupambana na rushwa, kama nilivyosema awali kua suala la kuangaliwa maslahi kwa watumishi wa mamlaka hii ni

muhimu, Mhe Spika, kamati yangu haijaridhika kabisa na kiwango cha mshahara na stashiki nyingine kwani Mkurugenzi huyu kutokana na majukumu yake kitaifa huwezi kumfananisha na Wakurugenzi wengine, kwa hiyo kamati yangu inaitaka Serikali kushirikiana na Kamisheni ya Utumishi wa Umma kuiangalia upya scheme of Service ili kuweza kumpangia maslahi Mkurugenzi huyu malipo yanayolingana na ugumu wa kazi yake pamoja na maofisa wake. kwani yeye in mtu kazi yake inamsababishia mazingira hatarishi katika kupewa rushwa tofauti na wakurugenzi wengine.

Mhe. Spika, baada ya hayo machache naomba Wajumbe wenzangu tuichangie,tuiboresha na baadaye tuipeitisha bajeti hii ili waende wakayatekeleze hayo yote tuliyoagaiza .

Ahsante sana,naomba kuwasilisha.

.....

Hamza Hassan Juma,

Mwenyekiti,

Kamati ya Kusimamia Ofisi za Viongozi Wakuu wa Kitaifa,

Baraza la Wawakilishi,

Zanzibar.